

Situacion financiero di Refineria di Aruba a subi mesa

Fase transitorio pa trahadonan Citgo por bira necesario

**Berdad di e riesgonan financiero di Citgo ta presenta su mes*

ORANJESTAD(AAN)--E ora di e gran berdad a yega pa e proyecto Citgo Aruba y advertencia pa e riesgonan grandi cu e proyecto ta contene ta haya rason. E victimanan directo di e proyecto Citgo ta bira trahadonan y tur instancia cu Citgo debe y pa cual na e momentonan aki Citgo lo no por pone placa riba mesa.

Informacionnan cu DIARIO a trece dilanti durante ultimo simannan ta papia palabra cla di e problemanan serio cu Citgo na Merca ta confronta, los for di medidanan cu Merca ta tuma.

Ta papia aki di un situacion financiero cu a wordo provoca dor di e maneho di regimen Maduro for di prome cu el a sinta na mesa cu Aruba pa firma e acuerdo. Infor-

macionnan di ultimo dianan a muestra con Minister Presidente Wever-Croes ta den contacto cu trahadonan, cu a pone nan confiansa grandi den un futuro nobo cu e proyecto di Citgo y cu awor hasta lo mester di un fase transitorio pa futuro segun informantenan.

Minister Presidente Wever-Croes ta na mesa cu e trahadonan y ta tene nan na altura di e situacion. Gobierno actual kier mantene e refineria habri pa e trahadonan tambe. Na momento cu un refineria nobo no por bini Aruba, e pais lo cay den un crisis total debi na e situacion financiero cu e ta laga atras mientras Aruba lo tin problema pa bay cobra Citgo cu no ta doño ni di su mas manera tur caso legal ta

establece.

Minister Presidente Wever-Croes pa prome bes lo a pone relatonan anual financiero di Refineria di Aruba riba mesa, loke lo no a sosode for di 2016 ora a reuni cu trahadonan.

E situacion actual y e acuerdo cu a alcanza pa Citgo no ta duna un indicacion. "Kico ta bay pasa si Citgo no por paga y di unda placa ta bay sali? Atrae un compania nobo no ta algo asina facil," a wordo splica na DIARIO. Gobierno mes no por bay fungi como operador di refineria loke ta nifica cu mientras no tin un compania cu ta cla pa firma sin ningun negociacion, mester yega urgente na areglo pa e trahadonan.

DIARIO semper a muestra

riba e riesgo cu na Aruba varios instancia y empresa lo bira victima di Citgo y e momento ta yega pa tur e instancia y empresanan aki wordo debidamente informa kico nan por spera si henter e sistema di placa cu ta pasa di un entidad legal pa otro na Citgo, bini abou.

"E situacion ta mucho mas serio cu por pensa," un informante a indica. E situacion actual ta uno di e problemanan pa cual Raad van Advies di Aruba a adverti na 2016, ora e organo di estado a duna su consejo riba e acuerdo cu a wordo alcanza pa gobierno y e estructura financiero cu Gobierno anterior a hinca den otro.

Importante ta bira si Aruba ta ricibi e placa cu e total di companianan den e proyec-

to mester entrega na caha di gobierno. Mester bay mira tambe con ta procura pa sigura cu tur instancia gubernamental y trahadonan ta haya loke ta toca nan.

Segun e acuerdo e compania madre di Citgo a para garantia pa gastonan te 150 Miyon si Citgo no por cumpla.

Raad van Advies na 2016 a muestra riba e riesgonan di e acuerdo, cu a bin cu un forma unico pa placa pasa di un entidad pa otro cu tambe a wordo cuestiona.

Siguridad ningun instancia no por duna ningun hende na e momentonan aki, manera informantenan clave ta indica.

Mester cuminsa papia di un fase transitorio si Citgo no por cumpli.